

Minister Benny Sevinger:

Ban haci uzo di Cas di Paradera, cuid'e y hiba nos calidad di bida na e siguiente nivel

ORANJESTAD – Minister di Infraestructura Benny Sevinger ta hunga un papel clave den e realisacion di proyectonan di MFA, mescos cu otro proyectonan importante tumando luga riba nos isla manera Green Corridor, Hospital, Waf di Barcadera entre otro.



Como tal, e anochi di apertura oficial di MFA Paradera tabata uno di satisfaccion pa e mandatario caminda a elogia su ekipo di trabou, arkitekto Jouel Croes, contratista BIC N.V. y otronan involucra. Su aprecio principal a bay na e origen di e vision y esey ta e trabou haci hunto cu Prome Minister Mike Eman.

“E vision cu a bin for di temponan di oposicion caminda bo ta prepara bo mes pa ora bo ta den Gobierno bo ehecuta plannan cu ta hiba bo bario, bo pueblo y bo Aruba na otro nivel di bida,” Minister Sevinger a bisa den su discurso.

“Awe noch ta un anochi di hopi alegria, un anochi cu nos a bini hunto pa un momento importante, un momento cu nos ta bay inaugura y en principio pasa over un proyecto na e pueblo di Paradera; un momento cu lo bay den historia como un di e momentonan mas importante di e bario aki,” e titular

di Infraestructura a expresa.

Na opinion di e mandatario, e vision aki ta uno mas grandi cu djis infraestructura.

“Kico e infraestructura ta bay nifica pa e calidad di bida di un ciudadano na momento cu bo drecha un bario, ora bo drecha centro di ciudad, ora bo trece un MFA? Kico ta ni-

e vision caminda nos ta wak cu infraestructura ta hunga parti importante.”

Adicional na e infraestructura di e pais, tambe tin e enfoke cu Gabinete Mike Eman ta pone riba e tereno social. “Premier Eman a mira con Gobierno mester ta cerca di su pueblo, duna servicio den e bario, tin un contacto entre e ciudadano y departamentonan di gobierno. Un centro caminda pueblo por haya servicio, bini hunto, caminda mamanan por haci diligencia, muchanan por hunga y e parti cultural tambe por tuma luga; tur servicio cu mester por sosode den cualkier ciudad.”

Minister Sevinger tambe a duna e debido reconocimiento na famia di Mito Croes. “Un gran lider di Paradera cu a bay laga nos. E dedicacion ta refleha e amor respet y dedicacion cu Mito a duna su pais y principalmente su bario di Paradera.” Finalisando, e mandatario tabatin un mensahe na e publico cu mas bien tabata un invitacion.

“Esaki ta un cas di Paradera, laga nos cuid'e, haci bon uzo di dje, bin hunto manera un bario unico riba nos baranca. Laga nos comparti y disfruta, traha pa boso nan, pa nos por hiba e y calidad di bida na un siguiente nivel.” □

